

مفتاح الفرج

سارة أبور يا



مسرحية مفتاح الفرج

تأليف: سارة أبوريا

مصر / 2025

جميع الصور: Google Gemini

للتواصل:

Fb/

<https://www.facebook.com/sara.abouriaia.3>

الشخصيات

أبو شامة : صاحب قهوة مفتاح الفرج، يتميز بزبه التقليدي وشاربه الضخم ودائمًا ما يستند على عصاه

حودة القهوجي: شاب في منتصف العشرينيات، دائم النشاط والحركة

شاب ١: مهتم بتسريحة شعره وملابسه

شاب ٢: حليق الرأس ويرتدي ملابس مقطعة

شاب ٣: يرتدي ملابس أشبه بملابس المصيف

فتاة ٣/٢/١: يتميزن باهتمامهن بالموضة

المذيعة: ترتدي ملابس صارخة وتضع مكياج بكثرة على وجهها

المصور: دائمًا ما يحمل الكاميرا ويضع كاب على رأسه

زوجة أبو شامة: تتميز بتمسكها بالزي التقليدي

درويش : يرتدي الجلباب والعمة

العالم: شاب في منتصف العشرينيات، ويرتدي ملابس قديمة ومهلهلة



الفصل الأول

يظهر عدد من الشباب يجلسون على الكراسي في منتصف المسرح، وينظرون إلى الموبايلات ويضحكون ويتصورون سيلفي ويقومون بعمل فيديوهات على بعض أغاني المهرجانات. يجلس المعلم أبو شامة في الركن البعيد يدخن الشيعة ويستند على عصاه، ومن وراه تظهر لافتة كبيرة معلقة مكتوب عليها "قهوة مفتاح الفرج". يدخل حودة القهوجي وهو يحمل صينية عليها المشاريب ويتوجه إلى مكان الشباب ويضعها أمامهم.

حودة: الشاي يا مشاهير الكون، والأكوان اللي جنبنا في المجرة

شاب ١: جت في وقتها يا حودة، الواحد عاوز يطلع تريند النهاردة

شاب ٢: بقالنا أسبوعين الريتش واقع

شاب ٣: منلقيش عندك فكرة صاروخ تشقلب الدنيا؟ وحقك محفوظ

حودة: ما أنا أولى بأفكاري، استفيد منها أحسن

أبو شامة: واد يا حودة يا حودة

حودة: جاللي يا معلم

(يتركهم حودة على استعجال، ويذهب إلى أبو شامة الذي يبدو منفعلًا)

أبو شامة: العيال دي مش هتمشي بقي؟! دول خللوا في القهوة

حودة: لاله شويتين تلاتة كدا يا معلم

أبو شامة: هي العالم دي معندهاش شغل ولا أهل يسألوا عليهم؟!

حودة: لا... عندهم الأهم يا معلم

أبو شامة: وهو إيه بقي الأهم؟

حودة: التريند يا معلم

أبو شامة (يرمي

الشيثة بغضب): تريند إيه وزفت إيه؟ إيه الكلام اللي مش بيحيب همه دا؟!
هو إيه اللي حصل في الدنيا يا ناس؟! تلت تيران قاعدين
شغل ولا مشغلة وماسكين الموبايلات ليل نهار، ولا
في دماغهم حاجة، وتيجي تقولي تريند! هو إيه دا بقي؟!

حودة: دا العصر يا معلم، وإحنا لازم نواكب العصر

(يقاطعهم أغاني المهرجانات الصاخبة في الخلفية، ويقوم الشباب من أماكنهم،
ويرقصون بشكل هستري ويقومون بحركات وإيماءات غريبة وهم يمسون
الموبايلات)

أبو شامة: إيه العبط دا؟! ما تقوم ياض منك له تشوفوا شغلانة بدل ما
أنتوا عالية كدا، قوم ياض منك له من هنا

شاب ١: في إيه يا معلم، مش بتأخذ حق المشاريب أول بأول، والقهوة شغالة زي الفل!

شاب ٢: بقولك يا معلم، تطلع معانا لايف؟ والله فكرة صاروخ تتفع تريند

(يتوجه الشباب إلي أبو شامة وحودة، ويقوم الشاب ٣ بالتصوير لايف. يقوم حودة بالإبتسام وتعديل ملابسه بينما يقف أبو شامة وهو لا يزال غاضبًا ومستنَدًا على عصايته)

شاب ٣: هاي بالمتابعين الجامدين، معانا النهاردة المفاجأة الكبرى ... المعلم أبو شامة، صاحب القهوة بتاعتنا، يلا يا معلم قول هاي

أبو شامة (يرفع عصايته بعصبية): يلا يا ض منك له من هنا، إيه الجنان والعبط دا؟

حودة: في إيه يا معلم؟! مش قدام الناس يا معلم

أبو شامة: أنت هتجنني أنت كمان! هي فين الناس دي؟!

شاب ٣ (يتحدث

إلى الموبايل): شوفتوا المعلم بيعمل فينا إيه؟

- أبو شامة: يلا ياوض من هنا
- شاب ٣: احنا محتاجين الدعم يا فانز، أي حد قريب من المكان يجي بسرعة، المعلم بيطرдна من المكان.... يلا مع بعض في صوت واحد "مش هنمشي هو يمشي" (ثم يغلق الموبايل)
- شاب ١: واو، كذا ضمنا التريند
- شاب ٢: ورجعنا من ثاني
- أبو شامة: أنا مش عاوز أشوفكم هنا ثاني
- شاب ٣: يا معلم، شغل دماغك معنا شوية وهتكسب ذهب
- شاب ٢: وهتاكل الشهد
- شاب ١: وهتبقى من المشاهير
- شاب ٣: وهتظهر على التليفزيون وعيالك وأهلك هيشوفوك
- شاب ٢: والكل هيجي لحد عندك
- شاب ١: ومش هتبقى ملاحق على الطلبات
- حودة: والزهر هيلعب معنا يا معلم

شاب ٢: دلوقت الكل هيجي عشان يشوف مين المعلم المتوحش اللي بيضربنا

شاب ١: واللي هيجي أكيد أكيد هيجي ويقعد ويطلب مشاريب

حودة: ونشتغل ونكسب يا معلم

(يقاطعهم دخول ثلاث فتيات)

فتاة ١: دي القهوة اللي فيها الضرب؟! أنتو بخير!؟

فتاة ٢: المتوحش دا عمل فيكو حاجة؟

فتاة ٣: نبليغ الشرطة ونعمل محضر؟

شاب ١: لالا، دا المعلم أهو بيصالحنا

شاب ٢: ويقينا زي السمنة على العسل

شاب ٣: مش قولتلك يا معلم، أهى بدأت تتدع

(تجلس الفتيات والشباب معاً ثم بالتدريج يدخل المزيد من الشباب والفتيات ليزدحم

المكان، وفي الخلفية أغنية شعبية)

أبو شامة: هو إيه اللي بيحصل دا؟!!

حودة: ملناش دعوة يا معلم، المهم المكسب، ماهو على يدك الحال واقف بقالنا فترة، وكل مدى الدنيا بتغلى حولينا.... خلينا نواكب العصر

أبو شامة: عندك حق يا حودة... نواكب العصر

(يذهب حودة إلى الشباب والبنات بينما يعود أبو شامة إلى الشيشة، تتقدم إحدي الفتيات إليه)

فتاة ١: ممكن صورة معاك يا عمو؟

أبو شامة: طبعًا يا مرحب

(تأخذ الفتاة صورة سيلفي معه، ويبدو عليه السعادة المبالغ فيها ثم تدخل مذيعة ومن وراءها مصور يحمل الكاميرا)

المذيعة: ممكن يا معلم نعمل معاك لقاء في برنامج واكب العصر؟

أبو شامة: طبعًا لازم نواكب العصر، اتفضلي يا أستاذة

(تجلس المذيعة أمام أبو شامة مبتسمة بينما يلتفت إليها الشباب والفتيات ويراقبون الوضع، بينما يضع المصور الكاميرا ويقوم بالتصوير)

المصور:

سكووت هنصور... أكشن

المدیعة:

اعزائي المشاهدين في كل مكان، أهلا ومرحبًا بكم في برنامجكم المفضل واكب العصر... معانا النهاردة صاحب التريند الأول في العالم العربي المعلم صاحب القهوة اللي ظهر وهو بيضرب بعض الشباب النهاردة، أهلا يا معلم

أبو شامة:

يا ألف نهار أهلا... يا ألف نهار جميل يا ست هانم

المدیعة:

ممكن يا معلم تحكي لنا عن إزاي بتعرف تضرب بالعصايا اللي معاك؟

(يمسك أبو شامة العصايا، ويقوم بتحريكها بشكل دائري)

أبو شامة:

والله يا ست هانم، أنا وارث العصايا دي من أبويا، وهو وارثها من أبوه، وهكذا... إنما ساعة الجد هتلاقيها في إيدي ع طول من غير تفكير ولا حتى تردد... يعلم الله إنني مكنتش ناوي اضربهم بس أنا كنت لا مؤخدة بواكب العصر

المدیعة:

عظيم جدًا، ممكن بقى نعيد مشهد الضرب اللي حصل، وخصوصًا إنني شايفة الشباب الجميل قاعد هناك

أبو شامة:

هو لا مؤخدة يا ست هانم، مش هتسأليني عن قصة

كفاحي، وإزاي قدرت أحافظ على قهوة مفتاح الفرج، قهوة
جدود جدودي من أيام محمد علي و....

المذيعة(مقاطعة): مش مهم يا معلم، المهم المشهد اللي طلع تريند

(يقتحم حودة اللقاء، ويهمس في أذن أبو شامة)

حودة: واكب العصر يا معلم..... واكب العصر

(يدخل الشباب الثلاثة، ويقوم أبو شامة بتمثيل المشهد بالحركة البطيئة بينما يقف
الحاضرون لمشاهدة ما يحدث، وبعد الإنتهاء يقومون بالتصفيق ثم يعودون إلى
أماكنهم)

المذيعة: وإلى هنا تنتهي حلقتنا، وفي لقاء قادم فى حلقة جديدة من

برنامجكم واكب العصر...وشكراً

(تخرج المذيعة من حقيبتها المال، وتعطيه لأبو شامة الذي ينظر إليها مندهشاً)

أبو شامة: إيه دا؟!!

المذيعة: دا نصيبك يا معلم، والشباب خلاص أخذوا حسابهم

حودة: واكب العصر يا معلم (إلى المذيعة) والبرنامج هنلاقيه فين يا

ست البنات؟

المذيعة: على السوشيال ميديا

حودة: يعني مش على التليفزيون؟

المذبةة: وهو مين اللي بقي بيتفرج على التليفزيون؟

(ياخذ أبو شامة النقود، وينظر فيها مندهشاً بينما تخرج المذبةة والمصور والشباب والفتيات)

أبو شامة: ياااه، دا أنا عمري ما مسكت المبلغ دا في إيدي مرة واحدة

(يخرج حودة المال من جيبه ويعطيه لأبو شامة)


أبو شامة: وإيه دا كمان؟

حودة: نصيبك من أرباح الفيديو اللي اتعملت في أقل من ٢٤ ساعة. ما هو خلاص بقي تريد

أبو شامة: بالسهولة دي؟!!

حودة: واكب العصر يا معلم

(يسدل الستار)



الفصل الثاني

تفتح الستار على القهوة وهي خالية من الزبائن والكراسي مرصوفة بينما يجلس المعلم أبو شامة في أحد الأركان، ويدخن الشيثة. يدخل حودة، وهو يحمل صينية فاضية ويتوجه إليه.

أبو شامة: هو في إيه يا واد يا حودة؟ القهوة معدتش جايبة همها زي اليومين اللي فاتوا كدا ليه؟

حودة: أصل الواد كحروت الموس أخذ التريند

أبو شامة: إيه؟ مين دا؟

حودة: دا عيل من عيال المنصة اللي بتدي فلوس على عدد المشاهدات، عمل فيديو من يومين يا معلم بس إيه... جامد جامد يعني، عيل دماغه نضيفة ومزاجه عالي وراح هوب واخذ التريند

أبو شامة: والتريند دا وصفته إيه؟ بيتعمل إزاي يعني؟

حودة: تعالى اعملك حساب يا معلم على المنصة اللي فيها الناس كلها، وبعد كدا تطلع تعمل فيديوهات

(يجلس حودة على الأرض بجوار أبو شامة، ويأخذ منه الموبايل ويبدو عليه التركيز)

حودة: بص يا معلم، دلوقتى بقى عندك حساب أهو، اسمك عليه
شامة التوتو

أبو شامة: توتو إيه يا بن ال.....، أنا مش توتو يا ض

حودة: توتو هو اللي ماشي اليومين دول.... واكب العصر يا معلم

أبو شامة: وبعد ما واكبت العصر وبقيت توتو، المفروض أعمل إيه
تاني؟

حودة: تعمل فيديوهات يا معلم

أبو شامة: إزاي؟ علمني يا واد

(يتم تشغيل أغاني مهرجانات في الخلفية بينما يرقص حودة بحركات بهلوانية
ومضحكة كما يقفز بطريقة هستيرية)

حودة: زي كدا يا معلم

(يضرب أبو شامة حودة على كتفه ليقع على الأرض)

أبو شامة: أنت عاوزني أبقي قرد يا ض!؟

حودة: معاش ولا كان اللي شايفك قرد يا معلم بس بقولك...

أبو شامة (مقاطعًا): لا تقول ولا تزيد ولا حتى تعيد.... دا أنا أروح أحلق شنبني
أحسن

حودة: يا معلم... الفرصة متتعوضش والمفروض تبني على نجاحك
اللى فات

أبو شامة: يعنى أقوم اضربك كام بوكس على وشك، وتنزل الفيديو؟!!

حودة: ضرب إيه بس يا معلم؟! خيلنا في حاجة جديدة، حاجة
محصلتش قبل كدا، حاجة تخلي الأضواء تجي عليك من
تاني

أبو شامة: تقصد إيه يا ض؟

حودة: ترقص

أبو شامة: أرقص؟!!

حودة: دا غصب عنك يا معلم، عشان الأضواء والشهرة والمذبة
اللى هتيجي تصور معاك تاني، والإنتشار على السوشيال
ميديا والناس تعرفك

أبو شامة: هو شنبني مش عجبك يا حودة؟ يا ض أنا راجل وليه هيبية...
أكبر شنبات عندنا في البلد بيعملولي ألف حساب... دا كفاية
بس وأنا رايح أزور العيال وأمهم، البلد كلها بتستخبي في

بيوتها

حودة: خلاص يا معلم، ورثهم الهيبة والشنب، خلي الهيبة تأكلهم
وتأكلنا معاهم بدل وقف الحال والغلو اللي محاوطنا...دا كل
يوم الحاجة بتغلي مش بترخص.. دا الناس يا معلم معذورة
تعمل أي حاجة عشان بس يسدوا جوع عيالهم

أبو شامة: مش بقلة القيمة يا حودة

حودة: أهو قرش يكفي جوع يوم يا معلم، وبعد ما الخير يجري في
إيديك اعتزل

أبو شامة: اعتزل؟

حودة: أيوا يا معلم...اعمل زي الناس اللي بعد ما تنتشر تطلع
تقولك أنا توبت، وبعد كدا تغير الفيديوهات من هلس ورقص
لمواعظ وحكم....كدا رزق، وكدا رزق

أبو شامة: طب هو أنت ليه مش بتعمل فيديوهات ياض؟ أهو يطلعك
قرشين بدل المرمطة اللي أنت فيها

حودة: لا يا معلم، أنا بستثمر في العصر

أبو شامة: وأنت بتعمل إيه بقي يا عبقرى زمانك؟

حودة: بواكب العصر بس بطريقتي

أبو شامة: اللي هي إيه ياواد؟

حودة: لا يامعلم، اللي زيك مش هيفهموا أنا بعمل إيه؟

أبو شامة: تقصد إني حمار مابفهمش!؟

حودة: لا يا معلم مقصدش، أنا أقصد أنني من بتوع النفس الطويل
إنما أنت واللي زيك اللي اتولدوا لاقوا ورث يعيشوا عليه
نفسكوا قصير... متشغلش بالك بيا يا معلم، أنا هلاقي في
يوم من الأيام مفتاح الفرج بتاعي، وفكر أنت تواكب العصر


(يخرج حودة بينما يرمي أبو شامة الشيشة، ويجلس يفكر)

أبو شامة: شامة التوتو... أنا بقيت توتو، ما أنا برودو محتاج فلوس، دا
غير إن الشهرة حلوة مفيش كلام، والناس اللي تسلم عليك في
الرايحة والجاية واللى عاوز يتصور معايا في كل مكان
أروحه عشان حنة فيديو مكلش دقيقة... أعمل إيه؟ محتاج
فلوس، ورايا إلتزامات، وأنا حبيت الأضواء... أنا عاوز الناس
تعرفني وتحسني إني ليا قيمة... مضطر أواكب العصر

(تنطفأ الأضواء ثم يُسمع أغاني مهرجانات في الخلفية. يضاء المسرح من جديد
ليظهر أبو شامة في منتصف القهوة وهو رابط وسطه بإيشارب ويرقص. يدخل

الشباب والفتيات المسرح ويجلسون على الكراسي ثم تدخل المذيعة ومن وراءها
المصور وتتحدث أمام الكاميرا)

(يسدل الستار)



الفصل الثالث

يظهر بعض الشباب والفتيات يجلسون على القهوة بينما يظهر أبو شامة جالساً بالقرب منهم، بدون شيشة وعصايا، يرتدي تيشرت مشجر وجينز كما تبدو تسريحة شعره معاصرة، وفي كل لحظة ينظر إلى الموبايل ويبتسم.

أبو شامة: حبايبي وأصحابي.... أعز ما ليا في الكون، بحبكم من كل قلبي وبقولكم صباح الخير والأنوار والليالي الملاح... بحبكم يا فانزاتي الأعزاء.... شامة توتو

(تدخل زوجة أبو شامة ومعها أخوها درويش، ويبدو عليهما الضيق إلى أن يقفا بجوار أبو شامة)

درويش: لابس كدا ليه يا معلم؟

أبو شامة: يا ألف مرحب، اتفضلوا، بقالي كثير ما شفنكيش يا أم العيال

زوجة أبو شامة: اتغيرت يا أبو العيال وحالك مال

أبو شامة: ليه كفي الله الشر! ما أنا عال العال أهو وبقيت ببعنتك فلوس أكثر من الأول، وطلباتك كلها مجابة من الألف إلى اليا

درويش: الفلوس بقت بالساهل كدا يا بن عمي؟! فين الحيا والهيبة؟ دفنتهم خلاص

أبو شامة: ليه بس يا درويش؟ الحيا والهيبة محافظ عليهم كويس ومخلي بالي من نفسي

دروييش: أمال إيه المسخرة والرقص اللي بنشوفك فيهم دول؟!

أبو شامة(ضاحكًا): دا أنا بواكب العصر

زوجة أبو شامة: عصر؟! عصر إيه اللي كله مسخرة وقلة قيمة، فين جوزي أبو عيالي ... أبو شامة اللي كان لما بيخشط في حد يطب ساكت؟! أنت بتقول على قلة القيمة دي عصر؟! دا القيامة قريت تقوم!

أبو شامة: افهمي يا أم العيال، دي طريقة العصر اللي بتجيب القرش من بُق الأسد...فلوس كتير، والخير أهو أنتي شايفاه بنفسك

زوجة أبو شامة: هو كل حاجة الفلوس الفلوس الفلوس... قيمتك راحت فين بين الناس؟! كل شوية ألاقي اللي يخبط على باب بيتي يقولي شوفي جوزك بيترقص إزاي؟ شوفي جوزك بيتمايص إزاي؟! أنت اتصابيت ولا ايه يا أبو شامة؟! دا حتي العيال بقوا مش عاوزين يروحوا مدارسهم بسبب التريقة اللي يتنزل عليهم من صباحية رينا لحد لما بيرجعوا

درويش: ارجع لعقلك يا أبو شامة، الفلوس مش كل حاجة،
والسهل بيروح بسرعة ومش بيدوم

أبو شامة(غاضباً): محدش ليه الحق إنه يكون واصي عليا ويقولي اعمل إيه
ومعملش إيه، أنا راجل دمي حامي

(تضحك إحدى الفتيات التي تجلس بالقرب منهم ضحكة عالية رقيقة)

زوجة أبو شامة: ما هو باين، يلا بينا يا درويش الظاهر إنه مفيش فائدة

(تخرج زوجة أبو شامة ودرويش بينما يدخل حودة ويجلس بجوار أبو شامة)

حودة: مالك يا معلم؟

أبو شامة: حرقولي دمي، الله يحرق دمهم

حودة: الفلوس بتداوي الجراح

أبو شامة: بس دي مسألة مبدأ

حودة: مبدأ إيه في ظروف صعب إن الواحد يلاقي القرش اللي

يخليه مرتاح البال يا معلم، دا كوكب الأرض كله على
المنصة بيرقص وبيغني

أبو شامة: قوم شوف شغلك، أنت هتصاحبني!

(يقوم حودة على الفور ثم يدخل العالم وهو يحمل رزمة ورق، ويبحث بنظره عن مكان يجلس فيه إلي أن يجلس بالقرب من أبو شامة. يتفحصه أبو شامة بنظره ثم يقوم ويجلس بجواره)

أبو شامة: الكريم مش من هنا؟

العالم: لا أنا من هنا، من جدود جدودي وإحنا عايشين هنا

أبو شامة: أمال حالك كدا لا يسر لا عدو ولا حبيب... أنت مش مواكب العصر ليه؟

العالم: تقصد إيه يا معلم بإنني أواكب العصر؟

أبو شامة: يعني تعمل زي ما الناس ما بتعمل اليومين دول

العالم: زي إيه؟

أبو شامة: تدخل على المنصة وتعملك كام فيديو، وتعلّي الريتس، وتكسب قرشين يغيروا أحوالك بدل الهلاهيل اللي عليك

العالم: والكام فيديو دول هيفيدوا البلد ولا الناس ولا الأجيال الجاية'

أبو شامة: وأنا مالي، يفيد ولا مايفدش، دور على مصلحتك بدل

الجوع اللي طافح على وشك

العالم: إزاي يا معلم؟! دا كل ثانية في عمرنا هنتحاسب عليها، لازم تسأل نفسك إيه الخير اللي هيعم على الناس لما تشوف فيديوهات كلها هلس ورقص؟

أبو شامة: وأنت بالورق اللي معاك دا هتوصل لإيه؟!!

العالم: مش مهم أوصل دلوقت، ممكن أوصل بعد ألف سنة من دلوقت، المهم أسيب أثر مهم ومفيد لغيري ينتفع به

أبو شامة: ويتاخذ على كدا كام في الشهر؟

العالم: الفلوس مش هي الكنز يا معلم، الفلوس مجرد وسيلة تقدر تجيب بيها أكل وشرب وبيت تعيش فيه وعلاج تتداوى به إنما مش هدف، ماينفحش بنى آدم يفني عمره كله ورا الفلوس

أبو شامة (ساخرًا): دا كلام فارغ، من غير قرش ما تشويش في الغابة اللي عايشين فيها

العالم: مسألتش نفسك يا معلم، لو كل واحد فكر بنفس طريقته دي، وجيت في يوم عيت ولا احتجت لعملية مين اللي هيداويك؟!!

أبو شامة:

الفلوس طبعًا

العالم:

وهي الفلوس تقدر تعملك عملية أو تكتبك رويشة أو
تشخص حالتك؟! ح حتى لو سافرت بلاد برا، هتدفع كتير
أوي... يمكن فلوس عمرك كلها، يبقى خسرت عمرك كله
مقابل لحظة زيادة من الحياة

(يقتحم حودة المناقشة ويهمس إلى أبو شامة ثم يذهب بعيدًا)

حودة:

واكب العصر يا معلم ... واكب العصر

أبو شامة:

الظاهر كدا أنت جربوع، وهتفضل جربوع

العالم:

بس ليا مكانتي على الأقل قدام نفسي

(يظلم المكان من حول أبو شامة، ويتم تسليط الضوء عليه لوحده. يقف وهو ينظر

حوله بفرع، ويُسمع صوت ضحكات عالية تحاصره من كل اتجاه)

أبو شامة:

لا... لا... لا... أنا لازم انجح في اللي بعمله، أنا لازم اثبت
لللك إني صح، دا عصر الفلوس، الفلوس السهلة اللي
بتيجي بالفهولة من غير تعب وشقا، من غير مجهود
وقرف ووجع دماغي وضياح صحة... أنا صح، لازم
أواكب العصر... لازم أبقى الملك اللي معاه الملايين
واللي حوليا تابعين... اسافر برا واعمل بيزنيس على كبير

وابقى نجم... نجم عظيم مضى، والكل يتمنى يحقق ربع
اللي حققته.... هعمل حفلات واغنى واسمع الكلام وأواكب
العصر، وكل ما اتهاجم اسرق التريند ويعلى الريتش
أيوا الفلوس هي العصر

(يضاء المكان من جديد ليظهر المسرح خاليًا بينما يقف أبو شامة في المنتصف
بينما يجري العالم إليه وهو يمسك رزمة الورق)

العالم يا معلم، أنت الوحيد اللي بثق فيه، خد الورق دا خبيه في
أي مكان

أبو شامة: امشي يا ض غور من هنا، مش أنا ملياش قيمة؟! إيه؟!
احلويت دلوقت!؟



العالم مش وقته الكلام دا، يا معلم انت في ايدك تتقذ الأجيال
القادمة

أبو شامة: أنا مليش دعوة بحد

العالم: والأجيال الجاية ذنبها إيه!؟

(ينظر أبو شامة إلى العالم ثم يمد يده إليه)

(يسدل الستار)



الفصل الرابع

يظهر المسرح خاليًا من الكراسي سوى كرسي واحد في أحد الأركان يجلس عليه أبو شامة، والذي يبدو عليه التقدم في العمر، ويستند على عصاه كما تظهر لافتة "قهوة مفتاح الفرج" مائلة من خلفه. يدخل حودة، وهو يرتدي بدلة أنيقة ونظارة طبية ويتقدم ناحية أبو شامة.

حودة: أهلاً يا معلم، عامل إيه؟

أبو شامة: مين؟! حودة... إيه اللي غيرك كدا يا واد؟!!

حودة: استثمرت في العصر

أبو شامة: واكبت العصر تقصد

حودة: لا يا معلم، أنا أقصد استثمرت مش واكبت

أبو شامة: مش فاهم

حودة: وأنت من أمتي كنت بتفهم يا معلم! أنت ضريت بكل

حاجة حوليك عرض الحائط وجريت ورا الفلوس

أبو شامة: مش أنت اللي كنت بتوسوس لي وتقولى واكب العصر؟!!

حودة: كنت تستعيز من الشيطان الرجيم يا معلم، أنا مضريتكش

على إيدك

أبو شامة:

رميت مراتي وعيالي وأهلي وناسي وقعدت أرقص وأهلس
لحد ما راحت عليا وصحيتي خانتني

حودة:

ودا الفرق اللي بيني وبينك يا معلم

أبو شامة:

ع آخر الزمن الصبي بتاعي بينظر عليا... يلا الدنيا
اتغيرت والمنصات هي كمان اتغيرت واتبدلت الأحوال،
دا حتى الموبايلات بقت قد ربع الكف.... آه يا زمن
آه...قعدت تقولي ارقص يا معلم، واكب العصر يا معلم،
واكبت العصر لحد ما وقعت في الوحل ومطلعتش

حودة:

عشان مش عاوز تتعلم يا معلم، أنت من الناس اللي
بتجري ورا السراب إنما اللي زيي، اللي اتكتب عليه
الشتات، كان لازم يواكب العصر بطريقته الخاصة،
الطريقة اللي تخليه ملك العالم كله...كان لازم اشغل
مخي واعمل نفسي بنفسي

أبو شامة:

وعملت إيه بقى يا عبقرى زمانك؟

حودة:

أبدأ ما عتمدتتش على السهل، صحيح كنت باخد من وراك
قرشين حلوين بس دا مكنش الأساس. الأساس يا معلم
اللي بنيت عليه امبراطوريتي إنى اتعلمت كل حاجة
جديدة وكل حاجة ليها علاقة بلغة العصر الحالي...
لغة التكنولوجيا لحد ما عملت أول منصة لنفسى بعد
عشر سنين من التعليم والمحاولات كل ما أفشل أبدأ

من جديد لحد ما وصلت لمنصة "كل عيشك بعرق
جيبك"

أبو شامة: سمعت عنها، بس ماشرتكتش فيها

حودة: ما هو لازم ماتشتركتش فيها، دي للناس اللي عندها
طموح، ما هو الناس بردو يا معلم لازم تتعب عشان
تاخذ قرشين، مش أي حاجة والسلام. وبعد ما المنصة
فرقت، وأخذت الشهرة بعته بالمليارات

أبو شامة: وأنت بقى إيه اللي جابك عندي الساعة دي يا بتاع
المليارات؟

حودة: تحب تاخذ مليار ولا اتنين يا معلم؟

أبو شامة: بترد لي جميل إنى أخذتك من الشوارع وشغلتك عندي
صبي بعد ما كنت متشرد مش لاقى اللضا؟!

حودة: لا يا معلم، دا مش جميل ولا فضل أنت عملته فيا... دا
قدري إن ميكنش ليا مكان محدد في الدنيا، وأنا راضي
بقدري... أنا عاوز حاجة تانية، تخيل يا معلم... تخيل
لو لحظة لو معاك مليار دولار هتعمل إيه؟

أبو شامة(ضاحكًا): مليار دولار مرة واحدة...ياااه دا أنا زمني كنت سيد
العالم، هتجوز أربع حوريات كل أسبوع، وأسافر وألف

البلاد كلها، وأكل كل الأكل الشهى اللي في العالم
واعمل بيت على البحر

حودة: كلها ملذات وكلام فاضي... رغباتك هي اللي جيباك
الأرض يا معلم

أبو شامة: بلاش انتقادات الله يخليك... إيه المقابل؟

حودة: فاكرا يا معلم... من زمن بعيد شوبيتين، دخل شاب شكله
جربوع ويقولوله العالم، كان معاه رزمة ورق واتخانقتوا
مع بعض عشان كان بيلومك على فيديوهاتك

أبو شامة: ماله دا؟

حودة: أنا فاكرا إنكوا اتصالحتوا بعد كدا، وساب عندك رزمة
الورق، ومن ساعتها وهو مظهرش ثاني

أبو شامة: مش فاكرا

حودة: أنا عاوز رزمة الورق دي يا معلم، تلمني

أبو شامة: أنا مش فاكرا أنت بتتكلم عن إيه بالظبط؟

حودة: متهزرش يا أبو شامة، مش هيدخل عليا الشويتين دول...
استني

(يخرج حودة من المسرح ثم يعود ثانية ومعه حقيبة، يفتحها أمام أبو شامة ويضعها أمامه)

حودة: شوف يا معلم... فلوس.. سهلة من غير أي مجهود

أبو شامة: كام دول؟

حودة: مليون

أبو شامة: مش كنت بتقول من شوية مليار ولا انتين؟! خسوا كدا ليه!

حودة: هديك كل اللي أنت عاوزه بس دلني على مكان الورق

أبو شامة: مش فاكِر أي حاجة، عالم إيه وورق إيه؟! مش فاكِر يا

حودة

حودة: كدا؟! طب أنا هقلب المكان كله

(يقوم حودة بالبحث في جميع الأركان ما عدا لافتة "قهوة مفتاح الفرج" ثم يخرج

ويعود سريعاً من جديد، ويأخذ الحقيبة من أمام أبو شامة)

حودة: خليك فاكِر يا معلم، أني جتلك من باب المودة والعشرة

اللي كانت بينا بالذوق والأدب، متخلنيش اتعامل معاك

بأسلوب ثاني خالص

أبو شامة: عارف أسلوب الشوارع والبلطجة بتوعك يا حودة، شوفتهم
زمان

حودة: وأنا لسه عند وعدي، لو عترت على الورق، أنا هعرف
وساعتها مش هرحمك أنت اللي رفضت جنتي، يبقى
استعد لجحيمي

(يخرج حودة منزعًا بينما يضحك أبو شامة، ويتجه نحو لافتة "قهوة مفتاح
الفرج" ويسحب من ورائها رزمة الورق)

أبو شامة: عاملى فيها وحش، وهو عيل عبيط، قال إيه بقي ملك
العالم كله وهو حمار... دا لو كان شغل مخه ولو ثانية
كان شاف يافطة جدود جدوي لسه محافظ عليها، وعاوزني
أبيع ورق العالم.... صحيح أنا ولا حاجة، ومليش قيمة،
واكبت العصر لحد ما ضيعت نفسي بس مش هبيع
مستقبل أحفادي ولو كان التمن روجي

(يسدل الستار)

النهاية

أعمال أخرى للكاتبة:

الكتب الخاصة بالسيناريو:

- 2021: كتاب "القصة السينمائية" عن دار المكتبة العربية للنشر والتوزيع
- 2022: كتاب "الحوار السينمائي" نشر ذاتي، ومتاح مجاناً على الإنترنت
- 2022: كتاب "من الجنس الأدبي إلى النوع الفيلمي" نشر ذاتي، ومتاح مجاناً على الإنترنت
- 2025: "كتاب السيناريو: كل ما تحتاجه لصناعة فيلم جيد هو مسدس وفتاة جميلة"، عن دار تمهيد للنشر والتوزيع.

الكتب المترجمة الخاصة بالسيناريو:

- 2024: الـ 36 موقفاً درامياً لميك فيغيز عن دار المكتبة العربية للنشر والتوزيع
- 2024: النوع الفيلمي من الأيقونوجرافية إلى الأيديولوجيا لباري كيث غرانت عن دار المكتبة العربية للنشر والتوزيع
- 2025: الفيلم متعدد الأبطال لماريا ديل مار أزكونا عن دار المكتبة العربية للنشر والتوزيع

كتابات أخرى:

- 2018: مجموعة قصصية بعنوان "شقة ٤٨" عن دار تويته

- 2018: رواية " يافا" عن دار المكتبة العربية للنشر والتوزيع
- 2019: مجموعة قصصية بعنوان " حكايات" عن دار المكتبة العربية للنشر والتوزيع
- 2019: رواية "دوائر" عن دار لوتس للنشر الحر
- 2023: رواية " مجرة درب التبانة" نشر ذاتي، ومتاحة مجاناً على الإنترنت
- 2023: كتاب "تأثير السينما والتلفزيون ووسائل التواصل الإجتماعي في الحياة الإجتماعية" نشر ذاتي، ومتاح مجاناً على الإنترنت
- 2023: رواية "رحلة إلى القمر" نشر ذاتي، ومتاحة مجاناً على الإنترنت
- 2023: مجموعة قصصية " صعود وهبوط" نشر ذاتي، ومتاحة مجاناً على الإنترنت

للمزيد من الإطلاع، يرجى زيارة

<https://sarafnon.blogspot.com>

